



Broj: 05-1862/04

Datum: 18.10.2004. godine

Na osnovu člana 11. stav 4. tačka 3. Zakona o Policiji Brčko Distrikta BiH ("Službeni glasnik Brčko Distrikta BiH" broj 2/00, 5/01, 2/02, 17/02, 6/03 i 15/04) i člana 53. alineja 3. Zakona o agencijama za obezbjeđenje lica i imovine i privatnoj detektivskoj djelatnosti ("Službeni glasnik Brčko Distrikta BiH" broj 27/04), Šef Policije donosi:

## **P R A V I L N I K**

### **O USLOVIMA I NAČINU OBAVLJANJA DETEKTIVSKIH POSLOVA**

#### **Član 1.**

Ovim Pravilnikom uređuju se uslovi i način obavljanja detektivskih poslova i prava i obaveze lica ovlaštenih za obavljanje detektivskih poslova (u daljem tekstu: detektiv).

#### **Član 2.**

U obavljanju detektivskih poslova detektiv može podatke, informacije i materijalne dokaze prikupljati na način utvrđen Zakonom o agencijama za obezbjeđenje lica i imovine i privatnoj detektivskoj djelatnosti (udaljem tekstu: Zakon) i ovim Pravilnikom.

#### **Član 3.**

- (1) U obavljanju detektivskih poslova detektiv ne može ograničavati slobodu kretanja građana, prijetnju ili ucjenu niti upotrebljavati vatreno oružje i druga sredstva prinude, osim u slučajevima propisanim Zakonom.
- (2) U obavljanju detektivskih poslova detektiv se ne može služiti obmanama, prevarama i falsifikatima.
- (3) Detektiv može nuditi i davati nagrade za dobijanje informacija, podataka i materijalnih dokaza iz djelokruga svoga rada.

#### **Član 4.**

- (1) Detektiv može objavljivati slike i podatke u sredstvima javnog informisanja radi traganja za nestalim osobama ili predmetima ili radi pribavljanja podataka, informacija ili materijalnih dokaza.
- (2) U oglasu mora biti naznačeno ime i prezime detektiva, a detektiv može naznačiti da je za davanje traženih podataka, informacija ili materijalnih dokaza predviđena nagrada.

#### **Član 5.**

Za vrijeme obavljanja detektivskog posla detektiv dužan je licu od kojeg prikuplja podatke pokazati detektivsku legitimaciju, a na njegov zahtjev i ugovor na osnovu kojeg obavlja ugovoreni posao.

**Član 6.**

- (1) Detektiv može na osnovu pisanog zahtjeva, prikupljati podatke od organa državne uprave i pravnih lica koja imaju javna ovlaštenja, propisana članom 38. Zakona.
- (2) Zahtjev iz stava 1. ovog člana mora sadržavati:
  - broj ugovora,
  - vrstu traženih podataka,
  - redni broj detektivske legitimacije i potpis detektiva koji podnosi zahtjev.

**Član 7.**

Detektiv može sa osiguravajućim društvima, hotelima, bankama i drugim pravnim licima sklapati pisane ugovore o stalnom ili povremenom obavljanju detektivskih poslova.

**Član 8.**

Detektiv slobodno određuje radno vrijeme za prijem stranaka i pismena.

**Član 9.**

Evidencije o sklopljenim ugovorima detektiv vodi u skladu sa propisima kancelarijskog poslovanja.

**Član 10.**

- (1) Detektiv je obavezan čuvati kopije izvještaja o obavljenom poslu tri godine od dana predaje izvještaja, podataka i materijalnih dokaza stranci.
- (2) U čuvanju poslovne tajne detektiv je dužan preduzimati mjere i radnje propisane Zakonom i drugim na Zakonu zasnovanim propisom.

**Član 11.**

Detektiv može samostalno ili putem međunarodnih udruženja i organizacija, prikupljati podatke i materijalne dokaze u drugim državama, u skladu sa propisima tih država.

**Član 12.**

Detektiv može biti član međunarodnih detektivskih udruženja.

**Član 13.**

- (1) U slučaju prestanka rada, detektiv je obavezan uništiti sve podatke i materijalne dokaze prikupljene tokom rada, najkasnije u roku od tri dana od dana prestanka rada.
- (2) Podaci i materijalni dokazi iz stava 1. ovog člana uništavaju se spaljivanjem ili mašinskim rezanjem.
- (3) O uništenju podataka i materijalnih dokaza iz stava 1. ovog člana detektiv će sastaviti zapisnik i isti dostaviti Policiji Brčko Distrikta BiH u roku od tri dana od uništenja podataka, materijalnih dokaza i izvještaja.
- (4) Ako detektiv prestaje s radom i nije u stanju lično uništiti podatke, materijalne dokaze i izvještaje, njegovi nasljednici, pravni sljedbenici ili zaposleni u detektivskoj agenciji o tome će odmah obavjestiti Policiju Brčko Distrikta BiH.

- (5) U slučaju iz stava 4. ovog člana, komisija koju formira Šef Policije Brčko Distrikta BiH preuzeće i uništiti podatke, materijalne dokaze i izvještaje i o tome sačiniti zapisnik.

**Član 14.**

Pravilnik stupa na snagu danom donošenja, a objaviće se u “Službenom glasniku Brčko Distrikta BiH”.

**Š E F  
POLICIJE BRČKO DISTRIKTA**

**Milenko Milićević**